



Na osnovu člana 70. stav 1. Zakona o organizaciji organa uprave u Federaciji Bosne i Hercegovine (“Službene novine Federacije Bosne i Hercegovine”, broj 35/05), Odluke o prihvatanju zaduženja Zeničko-dobojskog kantona po Sporazumu o zajmu između Bosne i Hercegovine i Međunarodne banke za obnovu i razvoj (IBRD) za projekat „Unapređenje kvalitete zraka“ (Službene novine Zeničko-dobojskog kantona broj: 06/25) i Sporazuma o razumjevanju broj: 12-11-14633/25 od 31.07.2025. godine, te u skladu sa Priručnikom o dodjeli bespovratnih sredstava za korisnike u okviru Projekta poboljšanja kvaliteta zraka BiH, Ministarstvo za prostorno uređenje, promet i komunikacije i zaštitu okoline, *raspisuje*

JAVNI POZIV

za dodjelu bespovratnih sredstava za projekte povećanja energetske efikasnosti u stambenom sektoru u Zeničko-dobojskom kantonu

1. PREDMET JAVNOG POZIVA

Predmet Javnog poziva je prikupljanje prijave fizičkih lica- korisnika postojećih stambenih objekata, radi dodjele bespovratnih sredstava za realizaciju mjera povećanja energetske efikasnosti u stambenom sektoru na području Zeničko-dobojskog kantona.

Bespovratna sredstva dodjeljuju se za projekte koji podrazumjevaju isporuku i ugradnju savremenih, energetski efikasnih sistema grijanja, u cilju smanjenja potrošnje energije, unapređenja kvaliteta zraka i smanjenja emisija zagađujućih materija iz individualnih kućnih ložišta.

Ovaj Javni poziv odnosi se isključivo na postojeće stambene objekte koji su u upotrebi, a koji se zagrijavaju putem individualnih ložišta.

Pod stambenim objektom u smislu ovog Javnog Poziva podrazumijeva se:

- individualna/porodična kuća;
- stambena jedinica u sklopu individualne/porodične kuće koju podnosilac prijave koristi kao mjesto stanovanja.

2. CILJEVI JAVNOG POZIVA SU:

- smanjenje emisija suspendovanih čestica PM₁₀ i PM_{2.5} iz individualnih kućnih ložišta;
- unapređenje kvaliteta zraka, posebno u urbanim i prigradskim sredinama;
- povećanje energetske efikasnosti postojećih stambenih objekata;
- smanjenje potrošnje energenata za grijanje domaćinstava;
- zamjena postojećih neefikasnih i visoko zagađujućih ložišta na čvrsta goriva savremenim i okolišno prihvatljivijim sistemima grijanja;
- doprinos ostvarenju dugoročnih ciljeva unapređenja energetske efikasnosti i smanjenja negativnih uticaja na okoliš na području Zeničko-dobojskog kantona.

3. MJERE KOJE MOGU BITI PREDMET PRIJAVE

Podnosilac prijave na Javni poziv može podnijeti prijavu za dodjelu bespovratnih sredstava provođenjem jedne ili više navedenih mjera, i to:

A. U individualnim/porodičnim kućama:

- unaprijeđenje sistema za proizvodnju i distribuciju toplotne energije za grijanje prostora i/ili pripremu potrošne tople vode: instalacija kotlova na pelet, toplotnih pumpi (zrak/voda i zrak/zrak), u skladu sa tehničkim uslovima propisanim Javnim pozivom za dobavljače¹

¹ Minimum tehničkih zahtjeva je definisano u Javnom pozivu za dobavljače opreme i ugradnju istih.

Sistem unutrašnjeg razvoda grijanja može biti predmetom dodjele bespovratnih sredstava samo u slučaju ako se podnosi prijava za mjeru instalacije kotla ili toplotne pumpe.

B. U stambenim jedinicama u sklopu u individualne/porodnične kuće.

- unaprijeđenje sistema za proizvodnju i distribuciju toplotne energije za grijanje prostora i/ili pripremu potrošne tople vode korištenjem toplotnih pumpi (zrak/voda i zrak/zrak).

Sistem unutrašnjeg razvoda grijanja može biti predmetom dodjele bespovratnih sredstava samo u slučaju ako se podnosi prijava za mjeru instalacije kotla ili toplotne pumpe.

Napomena:

Porodična kuća sa više zasebnih stambenih jedinica na Javni poziv se može prijaviti ili kao „individualna/porodična kuća“ (opcija **A**) ili kao „stambena/e jedinica/e u sklopu individualne/porodnične kuće“ (opcija **B**). U slučaju odabira opcije **A** (prijava na nivou cijelog objekta), podnosi se jedna prijava za cijeli objekat, uz obaveznu saglasnost svih korisnika objekta (ukoliko ih ima više). U tom slučaju zasebne stambene jedinice u okviru tog objekta ne mogu biti predmet dodatnih prijava za dodjelu bespovratnih sredstava, odnosno podnošenje prijava za pojedinačne stambene jedinice (opcija **B**) nije dozvoljeno.

U slučaju odabira opcije **B** (prijava na nivou stambene jedinice), podnosi se jedna prijava po stambenoj jedinici, pri čemu podnosilac prijave mora koristiti predmetnu stambenu jedinicu kao mjesto stanovanja. Ukoliko stambena jedinica nema posebno mjerno mjesto električne energije na ime podnosioca prijave, prihvatljivim će se smatrati i račun za električnu energiju koji se odnosi na cijeli objekat, uz uslov da podnosilac prijave dostavi izjavu da koristi predmetnu stambenu jedinicu kao mjesto stanovanja.

Po jednom mjernom mjestu električne energije može se podnijeti samo jedna prijava.

U slučaju podnošenja više prijava koje se odnose na isto mjerno mjesto električne energije ili isti stambeni objekat suprotno odredbama ovog Javnog poziva, takve prijave će se smatrati neprihvatljivim i bit će odbačene.

Odluka o načinu prijave (opcija **A** ili opcija **B**) je na korisnicima porodične kuće.

Sva oprema i materijali koji su predmet prijave moraju biti tvornički novi, odnosno da se prvi put stavljaju u upotrebu.

4. IZNOSI BESPOVRATNIH SREDSTAVA

Bespovratna sredstva u okviru ovog Javnog poziva dodjeljuju se za provođenje mjera povećanja energetske efikasnosti u postojećim stambenim objektima na području Zeničko-dobojskog kantona, u skladu sa uslovima utvrđenim ovim Javnim pozivom.

Dodjela bespovratnih sredstava vrši se po principu sufinansiranja, pri čemu učešće bespovratnih sredstava po pojedinačnoj mjeri iznosi do najviše 50% prihvatljivih troškova investicije, a u skladu sa maksimalnim iznosima utvrđenim za svaku pojedinu mjeru.

Bespovratna sredstva se odobravaju u iznosu do najviše 50% prihvatljivih troškova investicije po pojedinačnoj mjeri, ali ne više od maksimalnog iznosa utvrđenog za tu mjeru u tabeli u nastavku Javnog poziva.

U slučaju kombinovanja više mjera, maksimalni iznosi bespovratnih sredstava utvrđuju se i odobravaju zasebno za svaku pojedinačnu mjeru, u skladu sa ovim Javnim pozivom

Maksimalni iznosi bespovratnih sredstava, po vrstama mjera energetske efikasnosti, prikazani su u tabeli u nastavku.

Mjere		MAKSIMALNI IZNOSI BESPOVRATNIH SREDSTAVA	
		Objekti individualnog stanovanja	
		Maksimalni Iznosi (KM) (max. 50%)	
1)	Ugradnja peći/kotla na pelet	4.000	
2)	Ugradnja toplotne pumpe zrak-voda	7.000	
	zrak-zrak	3.000	
3)	Zamjena ili ugradnja novih instalacija	2.000	
4)	Izrada tehničke dokumentacije		
	Glavni projekt (arh./maš./ete.)	800	

Tabela 1.

Napomena: - Mjere se ne mogu birati samostalno, pri čemu mjera 2) (zrak-voda) obavezno podrazumijeva i mjeru 4) kao sastavni dio tehnički ispravne realizacije sistema, dok se mjera 3) može odabrati isključivo uz istovremenu primjenu mjere 1) ili 2) i mjere 4). Prijave koje nisu usklađene s obaveznim kombinacijama mjera smatraju se neprihvatljivim.

5. KORISNICI SREDSTAVA I USLOVI UČEŠĆA

Na Javni poziv mogu se prijaviti sva punoljetna zainteresovana fizička lica (građani) koja su korisnici stambenih objekata na području Zeničko-dobojskog kantona.

Pravo učešća na Javnom pozivu imaju korisnici stambenih objekata sa stalnom adresom boravka na navedenoj adresi objekta za koji se aplicira na području Zeničko-dobojskog kantona koji za grijanje koriste kotlove i peći na čvrsta goriva (ugalj i ogrjevno drvo). U slučaju da se objekat koristi i za poslovnu namjenu, udio stambene površine mora biti najmanje 51% u ukupnoj korisnoj površini objekta da bi objekat bio kvalifikovan za subvenciju u okviru Javnog poziva.

Projektom je predviđena zamjena postojećih kotlova i peći u individualnim stambenim jedinicama. Objekti moraju imati namjenu stalnog stanovanja što znači da objekti kao što su vikend objekti nisu obuhvaćeni ovim projektom.

Dozvoljena je subvencija za zamjenu jedne peći/kotla po domaćinstvu tj. po aplikaciji. To znači da ako domaćinstvo koristi više od jedne peći za grijanje, može ostvariti pravo za subvenciju jedne peći.

Predmet ovog Javnog poziva ne obuhvata zamjenu postojećih energetski efikasnih sistema grijanja (toplotne pumpe ili peći na pelet) drugim energetski efikasnim sistemima. Prijave koje se odnose na takve zamjene neće se smatrati prihvatljivim.

Sa mjerom unaprijeđenje sistema za proizvodnju i distribuciju toplotne energije za grijanje prostora i/ili pripremu potrošne tople vode može se prijaviti samo u slučaju da individualna/porodična kuća nije priključena na funkcionalan sistem daljinskog grijanja (toplanu).

Uslovi za učešće na Javnom Pozivu:

- da podnositelj prijave ima prijavljeno prebivalište na adresi objekta koji je predmet prijave u skladu sa Javnim pozivom;
- da se objekat koji je predmet prijave nalazi na području Zeničko-dobojskog kantona;

- u slučaju više korisnika nad objektom koji je predmet prijave da je osigurana pisana saglasnost svih korisnika za implementaciju mjera – kada se kao objekat prijavljuje individualna/porodična kuća;
- da je podnosilac prijave obezbijedio potrebno vlastito učešće/sredstva za zatvaranje finansijske konstrukcije projekta, koji se izmiruje direktno dobavljaču, u skladu sa Ugovora o realizaciji mjera energetske efikasnosti zaključenog između korisnika i dobavljača/izvođača;
- da podnosilac prijave prihvata uslove učešća definisane ovim Javnim pozivom;
- da je saglasan sa korištenjem ličnih podataka od strane Ministarstva/PIT-a za potrebe ovog Javnog poziva;
- da podnosilac prijave na Javni poziv prijavljuje samo jedan objekat smislu ovog Javnog poziva, pod jednim objektom podrazumijeva se individualna/porodična kuća ili jedna stambena jedinica u okviru individualne/porodične kuće, u skladu sa definicijama iz tačke 1. Javnog poziva;
- da će, ukoliko bude odabran kao korisnik po ovom Javnom pozivu, realizovati mjere koje su predmet prijave najkasnije u roku od **60 (šesdeset)** dana od dana prijema Odluke o odabiru korisnika;
- da je podnesena prijava na Javni poziv potpuna, odnosno da sadrži svu potrebnu obaveznu dokumentaciju, u skladu sa tačkom 6. ovog Javnog Poziva, te da je podnesena na način definisan Javnim Pozivom;
- da su ispunjeni i drugi uslovi utvrđeni Javnim pozivom.

Objekti koji nisu prihvatljivi za dodjelu bespovratnih sredstava putem Javnog poziva su:

- objekti koji su devastirani;
- objekti koji su strukturno neispravni, tj. imaju veća strukturalna oštećenja koja mogu ugroziti integralnu stabilnost objekta nakon implementacije mjera poboljšanja EE;
- objekti pod kulturno-historijskom zaštitom;
- objekti koji su u fazi izgradnje u trenutku objave Javnog poziva;
- objekti na koje se prvi put ugrađuju/instaliraju materijali i oprema.

6. OBAVEZNA DOKUMENTACIJA

1. Popunjena prijavi obrazac za dodjelu bespovratnih sredstava za implementaciju mjera povećanja energetske efikasnosti (EE) u stambenom sektoru (**OBRAZAC broj 1. dostupan na službenoj web stranici Vlade Zeničko-dobojskog kantona www.zdk.ba/javni-pozivi**);
2. Ovjerena izjava vlasnika objekta da je saglasan da podnosilac prijave može aplicirati za jednu od mjera (**Obrazac Izjave broj 2. dostupan na službenoj web stranici Vlade Zeničko-dobojskog kantona www.zdk.ba/javni-pozivi**);- Ukoliko je podnosilac prijave vlasnik objekta izjava nije potrebna;
3. Ovjerena Izjava podnosioca prijave, (**Obrazac Izjave broj 3. dostupan na službenoj web stranici Vlade Zeničko-dobojskog kantona www.zdk.ba/javni-pozivi**)
 - a) o osiguranju sredstava za zatvaranje finansijske konstrukcije projekta;
 - b) o prihvatanju uslova učešća datih u Javnom pozivu;
 - c) da po izvršenoj ugradnji opreme koja je predmet dodjele bespovratnih sredstava, ista neće biti predmet prodaje, niti poklona, 3 (tri) godine od dana završetka projekta (ukoliko to bude jedna od realizovanih mjera);
 - d) da će omogućiti licima koje ovlasti Ministarstvo/PIT pristup objektu godinu dana nakon realizacije mjera, radi verifikacije namjenskog korištenja istih;
 - e) da je saglasan za korištenje ličnih podataka od strane Ministarstva/PIT samo za potrebe Javnog poziva;
 - f) da će, ukoliko bude odabran kao korisnik po ovom Javnom pozivu, realizovati mjere koje su predmet prijave najkasnije u roku od **60 (šesdeset)** dana od dana prijema Odluke o odabiru korisnika;

- g) da prijavljuje na Javni poziv samo jedan objekat smislu ovog Javnog poziva, pod jednim objektom podrazumijeva se individualna/porodična kuća ili jedna stambena jedinica u okviru individualne/porodične kuće, u skladu sa definicijama iz tačke 1. Javnog poziva.
 - h) da za mjeru koja je predmet prijave na Javni poziv nije koristio niti ostvario pravo na sredstva od drugog nivoa vlasti u Bosni i Hercegovini, te da ista mjera nije finansirana iz drugih javnih izvora, odnosno da u slučaju prijave po istom osnovu sredstva nisu odobrena niti isplaćena ili je postupak dodjele u toku.
 - i) da je upoznat/a da se projektno-tehnička dokumentacija, ukoliko je prema vrsti mjere obavezna, izrađuje prije zaključenja ugovora, te da u slučaju da se ista izradi, a odustane od realizacije mjere, snosi u cijelosti troškove njene izrade, bez prava na potraživanje bilo kakve naknade ili refundacije iz grant sredstava.
4. Ovjerena Izjava u slučaju više korisnika nad objektom, kojom se daje saglasnost za implementaciju mjera poboljšanja energijske efikasnosti na objektu koji je predmet prijave na Javni poziv (*Obrazac Izjave broj 4. dostupan na službenoj web stranici Vlade Zeničko-dobojskog kantona www.zdk.ba/javni-pozivi*)- dostavlja se samo kada se kao predmet prijave prijavljuje „stambena jedinica u sklopu individualne/porodične kuće“ odnosno kad cijeli objekat koristi više korisnika (npr. više stambenih jedinica u sklopu individualne/porodične kuće);
 5. Uvjerenje/obavještenje o prijavljenom prebivalištu podnosioca prijave na adresi objekta koji je predmet prijave na Javni poziv (CIPS obrasci PBA-3 ili PBA-4) – izdato od strane MUP-a ZDK, ne starije od 30 dana računajući od dana prijave na Javni poziv – **original ili ovjerena kopija**; Obrazac PBA-3 dostavlja se u slučaju prijave individualne/porodične kuće, dok se obrazac PBA-4 dostavlja u slučaju prijave stambene jedinice u sklopu individualne/porodične kuće.

Napomena: Prijave uz koje se dostave neki drugi obrasci umjesto PBA-3 ili PBA-4, smatrat će se nekompletnim i bit će odbijene.

6. Fotokopija važeće lične karte– **ovjerena kopija**;
7. Računi za uslugu snabdijevanja električnom energijom za posljednja 3 (tri) mjeseca koja prethode datumu prijave na Javni poziv (kao dokaz o stalnom boravku na adresi objekta koji je predmet prijave). Adresa mjernog mjesta na računu mora odgovarati adresi objekta koji je predmet prijave. Dostavljaju se cijeloviti računi na kojima je jasno vidljiva ostvarena potrošnja u kWh. **Zbir utrošene električne energije za navedena 3 (tri) mjeseca mora iznositi minimalno 300 kWh. – original ili kopija cijelog računa**;
8. Ovjerena Izjava u slučaju da se adresa (naziv ulice ili kućni broj) objekta iz Uvjerenja o prebivalištu (CIPS) i adresa mjernog mjesta na računu za električnu energiju razlikuju, a radi se o istom objektu. Podnosioc prijave je u tom slučaju obavezan dostaviti izjavu da se radi o istom objektu.- (*Obrazac Izjave broj 5. dostupan na službenoj web stranici Vlade Zeničko-dobojskog kantona www.zdk.ba/javni-pozivi*);
9. Ovjerena Izjava u slučaju da stambena jedinica u sklopu porodične kuće nema posebno mjerno mjesto električne energije na ime podnosioca prijave. U tom slučaju prihvatljivim će se smatrati i račun za električnu energiju koji se odnosi za cijeli objekat, uz obavezu da podnosilac prijave dostavi izjavu kojom potvrđuje da predmetnu stambenu jedinicu koristi kao mjesto stanovanja.- (*Obrazac Izjave broj 6. dostupan na službenoj web stranici Vlade Zeničko-dobojskog kantona www.zdk.ba/javni-pozivi*)- Dostavlja se u slučaju prijave stambene jedinice u sklopu individualne/porodične kuće.
10. Foto-dokumentacija postojeće opreme/tehničkih sistema (postojeći kotlovi/peći/sistemi grijanja i sl.) - Dostavlja se fotografija postojećeg izvora toplote i postojećeg razvoda grijanja ukoliko isti postoji;
11. U slučaju prijave za mjeru „**Ugradnja toplotne pumpe (zrak-voda)**“ na predmetnom objektu, koji je predmet prijave obavezno dostaviti:

- a) Ovjerenu Izjavu kojom se potvrđuje da, u slučaju odobravanja prijave, dobavljač/izvođač koji se nalazi na listi podobnih izvođača odobrenih od strane Ministarstva/PIT-a za isporuku i ugradnju opreme obezbijedi izradu projektno tehničke dokumentacije putem ovlaštenog i cetificiranog lica, u skladu sa važećim propisima.- (Obrazac Izjave broj 7. dostupan na službenoj web stranici Vlade Zeničko-dobojskog kantona www.zdk.ba/javni-pozivi)-
- b) Ovjerenu Izjavu da su na objektu koji je predmet prijave provedene ili da će biti provedene mjere energetske efikasnosti na vanjskom omotaču, što podrazumijeva izvedenu termoizolaciju fasade radi postizanja optimalnih energetskih efekata i maksimalnih ušteda energije, - (Obrazac Izjave broj 8. dostupan na službenoj web stranici Vlade Zeničko-dobojskog kantona www.zdk.ba/javni-pozivi)

Napomena: Troškovi izrade projektno dokumentacije smatraju se opravdanim troškovima projekta i mogu biti predmet sufinansiranja, u skladu sa tabelom maksimalnih iznosa bespovratnih sredstava definisanom ovim Javnim pozivom,

Napomena: Projektno-tehnička dokumentacija, ukoliko je prema vrsti mjere obavezna, mora biti izrađena od strane ovlaštenog lica prije zaključenja ugovora između korisnika i dobavljača i prije početka radova. Ugovor se zaključuje na osnovu izrađene projektno dokumentacije i mora odražavati stvarni obim radova i ukupnu vrijednost investicije. Dokumentacija se ne dostavlja uz prijavu, već je dobavljač dostavlja uz Zahtjev za isplatu grant sredstava.

Ukoliko se projektno-tehnička dokumentaciju izradi prije zaključenja ugovora, a korisnik naknadno odustane od realizacije mjere ili ne dođe do zaključenja ugovora o dodjeli bespovratnih sredstava, troškove izrade iste snosi korisnik, bez mogućnosti ostvarivanja prava na refundaciju iz grant sredstava.

Korisnik je dužan o vlastitom trošku obezbijediti sve tehničke i infrastrukturne uslove potrebne za ugradnju i rad opreme (uključujući eventualno povećanje priključne snage električne energije, izmjenu ili nadogradnju elektroinstalacija, napojne kablove, osigurače, razvodne ormare i druge pripremne radove), osim troškova projektno-tehničke dokumentacije koji se, ukoliko su predviđeni kao prihvatljiva mjera, sufinansiraju do maksimalnog iznosa utvrđenog ovim Javnim pozivom, dok se ostali troškovi ne finansiraju iz grant sredstava.

7. PREUZIMANJE DOKUMENTACIJE ZA JAVNI POZIV

Dokumentacija za Javni poziv može se preuzeti sa web stranice Vlade Zeničko dobojskog kantona (www.zdk.ba/javni-pozivi)

8. MJESTO I ROK ZA PODNOŠENJE PRIJAVE

Javni poziv ostaje otvoren do **30.09.2026. godine**, a objavit će se na oglasnoj tabli Ministarstva za prostorno uređenje promet i komunikaciju i zaštitu okoline i web stranici Vlade Zeničko dobojskog kantona, dnevnom listu, krajnji rok za podnošenje prijave je **30.09.2026.godine** Neblagovremene prijave i prijave koje nisu dostavljene u skladu sa tačkom 6. Javnog poziva neće se uzeti u razmatranje.

Popunjen obrazac sa pratećom dokumentacijom, dostavlja se lično na Protokol Zeničko-dobojskog kantona ili putem pošte na sljedeću adresu:

ZENIČKO-DOBOJSKI KANTON

Ministarstvo za prostorno uređenje, promet i komunikaciju i zaštitu okoline

Kučukovići br.2

72 000 Zenica

Sa naznakom

„Prijava na Javni poziv za dodjelu bespovratnih sredstava za projekte povećanja energetske efikasnosti u stambenom sektoru u Zeničko-dobojskom kantonu– NE OTVARATI“.

Prijave dostavljene drugim putem (npr putem faksa ili e mail), neće biti uzete u razmatranje. Dostavljena dokumentacija po Javnom pozivu se ne vraća podnosiocu prijave. Nepotpune i neblagovremene prijave, kao i prijave koje nisu podnesene na propisanim obrascima, neće se razmatrati i bit će odbijene bez mogućnosti naknadne dopune.

9. USLOVI KORIŠTENJA BESPOVRATNIH SREDSTAVA I PRIHVATLJIVI TROŠKOVI

Vrijednost projekta, odnosno procijenjena vrijednost investicije koja je predmet prijave, kao i pojedinačne mjere i njihovi pripadajući troškovi, moraju biti realni, opravdani i usklađeni sa važećim tržišnim cijenama u trenutku implementacije mjera.

Prihvatljivim se smatraju cijene opreme, materijala, radova i usluga koje su u skladu sa cijenama koje dostavljaju dobavljači/izvođači sa liste odobrenih dobavljača za isporuku opreme sa ugradnjom utvrđene od strane Ministarstva za prostorno uređenje promet i komunikacije i zaštitu okoline Zeničko dobojskog kantona.

Ministarstva za prostorno uređenje promet i komunikacije i zaštitu okoline Zeničko dobojskog kantona putem Projektno implementacionog tima-Pit (u daljem tekstu: Ministarstvo) zadržava pravo da, u slučaju utvrđivanja finansijski neopravdanih ili tržišno precijenjenih troškova, takve prijave odbije ili umanju iznos prihvatljivih troškova.

Ukoliko se prijava podnosi za mjeru za koju je obavezna izrada projektne dokumentacije, podnosilac prijave dužan je dostaviti izjavu kojom potvrđuje da je saglasan da, u slučaju odobravanje prijave, dobavljač/izvođač koji se nalazi na listi podobnih dobavljača/izvođača odobrene od strane Ministarstva za isporuku opreme sa ugradnjom obezbjedi izradu projektne tehničke dokumentacije putem ovlaštenog i certificiranog lica, u skladu sa važećim propisima.

Nakon odobravanja prijave, dobavljač/izvođač je obavezan obezbijediti izradu projektne tehničke dokumentacije putem ovlaštenog i certificiranog lica, u skladu sa važećim propisima.

Troškovi angažovanja ovlaštenog i certificiranog lica, kao i troškovi izrade projektne tehničke dokumentacije, smatraju se prihvatljivim troškovima u skladu sa Tabelom 1. iznosa bespovratnih sredstava, te se zajedno sa projektom i odgovarajućim fiskalnim računom i/ili fakturom, dostavljaju uz Zahtjeva za isplatu grant dijela troškova

Iznos sredstava od strane Projekta, koji se prema dostavljenoj prijavi odobri, predstavlja maksimalan iznos koji podnosilac prijave može ostvariti u skladu sa opravdanim troškovima. Dobavljač/Izvođač će biti dužan opravdati utrošak ukupnih sredstava predviđenih za realizaciju projekta, kako vlastitih tako i sredstava Projekta.

Svako naknadno povećanje troškova realizacije mjera iznad odobrenog iznosa investicije snosi korisnik. Ukoliko ukupni opravdani troškovi na kraju realizacije projekta budu manji od onih odobrenih prijavom. Ministarstvo će finansijski učestvovati u skladu sa procentualnim učešćem prema uslovima iz Javnog poziva, ali ne više od maksimalnog iznosa učešća odobrenog po prijavi

Nakon što realizuje mjere, dobavljač je dužan dostaviti Ministarstvu zahtjev za isplatu grant dijela troškova. Po prihvatanju istog Ministarstvo šalje nalog za plaćanje PMU, PMU će dobavljaču jednokratno isplatiti bespovratna sredstva po osnovu potpisanog Ugovora i to u odgovarajućem iznosu investicije koji je definisan Ugovora o realizaciji mjera energetske efikasnosti zaključenog između korisnika i dobavljača/izvođača.

Uz Zahtjeva za isplatu grant dijela troškova mogu se priznati isključivo fiskalni računi i fakture izdani nakon datuma potpisivanja Ugovora o realizaciji mjera energetske efikasnosti zaključenog između korisnika i dobavljača/izvođača, te isti ne smiju biti stariji od navedenog datuma u Ugovoru.

Ministarstvo neće priznavati zahtjeve za isplatu sredstava, niti će odobrena sredstva biti isplaćena, ukoliko dokumentacija iz tačke 11. (Relizacija prihvaćenih mjera). Javnog poziva bude dostavljena nakon roka definisanog Ugovora o realizaciji mjera energetske efikasnosti zaključenog između između korisnika i dobavljača/izvođača

Opravdani troškovi po ovom Pozivu su troškovi koji obuhvataju obavezno i nabavku materijala i ugradnju istog, (tvornički novih materijala, tehničkih sistema i opreme koji se prvi put stavljaju u upotrebu). Vrijeme nastanka troška utvrđuje se datumom izdavanja fiskalnog računa i fakture od strane izvođača radova/dobavljača opreme. **Nisu prihvatljivi troškovi samo nabavke materijala/opreme.**

Ministarstvo neće priznavati troškove djelimične provedbe pojedinačnih mjera, što znači da će se sredstva isplaćivati samo za mjere koje su provedene u cjelosti. Cjelovitost provedbe mjera dokazuje se foto-dokumentacijom realizovanih mjera i terenskim obilaskom.

Ministarstvo neće priznavati troškove realizovanih mjera ukoliko iste nisu izvršene u skladu sa Ugovorom. Ispunjenje ovog uslova, te utvrđivanje namjenskog utroška sredstava Ministarstvo će izvršiti terensku provjeru putem ovlaštene predstavnik Ministarstva ili angažovano stručno lice, o čemu se korisnik i/ili dobavljač prethodno obavještavaju. Neomogućavanje pristupa objektu ili onemogućavanje provjere može predstavljati osnov za obustavu postupka isplate ili povrat sredstava.

10. OBRADA PRIJAVA

Pregled pristiglih prijava na Javni poziv, vršit će se putem Projektnog implementacionog tim Zeničko-dobojskog kantona (u daljem tekstu: PIT tim). PIT tim razmatra prijave primljene na bazi Javnog poziva kontinuirano po prispjeću, odnosno prema redoslijedu zaprimanja, cijeneći ispunjenost uslova datih u Javnom pozivu kao kriterija za odobravanje. PIT tim će kontinuirano vršiti pregled zaprimljenih prijava sve do trajanja ovog Javnog poziva. Nakon podnošenja prijave, odnosno tokom pregleda prijave, korisniku nije omogućeno niti će od njega biti traženo da izvrši dopunu, pojašnjenje ili korekciju unesenih podataka i dokumentacije.

Prijave koje nisu dostavljene u traženoj formi na način opisan u Javnom pozivu, koje ne sadrže svu traženu dokumentaciju ili ne ispunjavaju uslove iz tačke 6. Javnog poziva, neće biti uzete u razmatranje. Također, prijave zaprimljene na način drugačiji od onog propisanog Javnim pozivom neće biti predmet razmatranja-

Lista odabranih korisnika koji ispunjavaju uslove Javnog poziva objavljuje se na web stranici Vlade Zeničko-dobojskog kantona. Lista odabranih korisnika objavljuvat će se periodično u intervalima od 15 dana na zvaničnoj web stranici Vlade Zeničko-dobojskog kantona, (www.zdk.ba/javni-pozivi) u skladu sa dinamikom obrade zaprimljenih prijava i raspoloživim finansijskim sredstvima.

Podnosioci prijave čije prijave ne ispunjavaju uslove propisane Javnim pozivom neće biti uvršteni na listu odabranih korisnika, te će se lista prijava koje ne ispunjavaju uslove Javnog poziva (odbijene prijave) objavljuvati periodično, u intervalima od 15 dana, na zvaničnoj web stranici Vlade Zeničko-dobojskog kantona.

Podnosilac prijave ima pravo podnijeti prigovor u roku od sedam (7) dana od dana objave liste na web stranici Vlade Zeničko-dobojskog kantona. (www.zdk.ba/javni-pozivi)

Nakon pregleda i obrade prijava, PIT tim sačinjava prijedlog liste odabranih korisnika, vodeći računa o dinamici zaprimanja prijava. Prijedlog liste dostavlja se ministru radi donošenja Odluke o odabiru korisnika za dodjelu bespovratnih sredstava, koja se donosi u roku od 30 dana od dana okončanja obrade pojedinačne prijave i predstavlja osnov za nastavak realizacije mjera i zaključenje ugovora između korisnika i dobavljača. Odluke se donose sukcesivno, u skladu sa dinamikom obrade prijave i objave lista odabranih korisnika.

Odluka o odabiru dostavlja se podnosiocima prijava putem pošte i/ili elektronskim putem (e-mail), zajedno sa daljim uputama o nastavku postupka i realizaciji odobrenih mjera, kao i Listom odabranih dobavljača za isporuku opreme sa ugradnjom, sa koje korisnik samostalno vrši izbor dobavljača. Korisnik koji odustane od realizacije mjere nakon donošenja Odluke o odabiru obavezan je pisanim putem (e-mail/pošta) obavijestiti Ministarstvo/PIT, bez odlaganja.

Podnosioci čije prijave na Javni poziv budu odbijene zbog određenih nedostataka, u toku trajanja Javnog poziva mogu ponovo izvršiti prijavu pod uslovom da su prethodno otklonili navedene nedostatke.

Nakon utroška odnosno dodjele svih raspoloživih sredstava, prijave koje ostanu nepregledane, putem maila će dobiti obavijest o istom.

11. REALIZACIJA PRIHVAĆENIH PRIJAVA

Nakon dostavljanja Odluke o odabiru, zajedno sa daljim uputama o nastavku postupka i realizaciji odobrenih mjera, kao i Listom odabranih dobavljača za isporuku opreme sa ugradnjom korisnik je dužan da se javi jednom od dobavljača koji se nalazi na Listi podobnih dobavljača/izvođača odobrenih od strane Ministarstva za prostorno uređenje promet i komunikaciju i zaštitu okoline Zeničko-dobojskog kantona za isporuku opreme sa ugradnjom sa koje korisnik slobodno i samostalno vrši izbor dobavljača. Također Lista je dostupna na web stranici Vlade Zeničko-dobojskog kantona (www.zdk.ba/javni-pozivi).

Ministarstvo putem Projektnog implementacionog tima (PIT) dostavlja obrasce Ugovora o realizaciji mjera energetske efikasnosti dobavljačima sa Liste podobnih dobavljača/izvođača odobrenih od strane Ministarstva za isporuku opreme sa ugradnjom.

Dobavljač je dužan, po javljanju korisnika, bez odlaganja zaključiti ugovor o realizaciji mjera između korisnika i dobavljača u četiri (4) istovjetna primjerka, koji potpisuju obje strane.

Dobavljač/izvođač je obavezan, prije zaključenja ugovora sa korisnikom i prije bilo kakve isporuke i ugradnje, izvršiti uvid u Odluku o odabiru korisnika (original ili ovjerena kopija/elektronska kopija sa verifikacionim elementima). Bez važeće Odluke o odabiru, dobavljač ne može zaključiti ugovor niti realizovati mjeru koja se finansira grant sredstvima.

Po potpisivanju četiri (4) istovjetna ugovora:

- jedan (1) primjerak zadržava korisnik,
- jedan (1) primjerak zadržava dobavljač/izvođač,
- a dva (2) primjerka dobavljač/izvođač prilaže uz Zahtjev za isplatu grant sredstava koji dostavlja Ministarstvu/PIT-u, zajedno sa ostalom propisanom dokumentacijom.

Sklapanjem Ugovora korisnik prihvata uslove zajedničkog sudjelovanja u dodjeli bespovratnih sredstava. Korisnik je obavezan iz vlastitih sredstava finansirati 50% ukupne vrijednosti investicije (vrijednost odabrane mjere iz Tabele 1. i troškovi ugradnje), odnosno razliku između odobrenog iznosa bespovratnih sredstava i ukupne vrijednosti opreme/radova utvrđene ugovorom sa dobavljačem. Svako prekoračenje cijena ili dodatni radovi koji nisu obuhvaćeni odobrenom mjerom padaju na teret korisnika.

Ugovor korisnik–dobavljač mora najmanje sadržavati:

- broj i datum Odluke o odabiru korisnika,
- tačnu mjeru/tehnologiju, tehničke specifikacije (proizvođač, model, snaga),
- mjesto ugradnje,
- ukupnu vrijednost investicije, (vrijednost opreme (mjere), troškovi izrade projektno tehničke dokumentacije ukoliko je primjenljiva i troškovi ugradnje)
- iznos granta
- iznos učešća korisnika,
- rokove isporuke/ugradnje, garancije,

Ukupna vrijednost investicije i finansijska struktura moraju biti jasno razdvojeni na iznos koji snosi korisnik i iznos grant sredstava, pri čemu grant ne može prelaziti procenat i maksimalni iznosa definisan Javnim pozivom.

Nakon zaključenja Ugovora nije moguće mijenjati ugovorne odredbe kojima su regulisani rokovi i učešće uključenih strana, kao niti odredbe vezane uz uslove Poziva.

Nakon potpisivanja Ugovora, korisnik je dužan uplatiti iznos vlastitog učešća definisan Ugovorom. Dobavljač pristupa realizaciji mjera tek nakon zaključenja Ugovora i uplate učešća korisnika, te je dužan po završetku realizacije mjera iz Ugovora podnijeti Zahtjev za isplatu grant sredstava.

Dostavljanje **Zahtjeva za isplatu grant dijela troškova**, dobavljač obavlja kroz sljedeće korake:

Popunjavanjem obrasca **Zahtjeva za isplatu grant dijela troškova**, uz koji prilaže dokumentaciju kojom dokazuje realizaciju mjera na način i u skladu sa uslovima iz Javnog poziva po kojem je izvršena prijava. Dokumentacija koju je uz Zahtjev potrebno dostaviti:

- Fakture sa fiskalnim računima dobavljača opreme s detaljnim troškovnikom, sa jasno naznačenim količinama, jediničnim i ukupnim cijenama i specifikacijom svih materijala/opreme i radova, a kojom se svjedoči ispunjavanje traženih tehničkih uslova – originalne primjerke. Fiskalni računi i fakture moraju biti izdani nakon datuma potpisivanja Ugovora o realizaciji mjera energetske efikasnosti, te isti ne smiju biti stariji od navedenog datuma u Ugovoru.
- Fotodokumentaciju objekta/sistema nakon realizacije mjera, kojom se dokazuje novo stanje objekta/sistema.
- Potpisan Ugovor o realizaciji mjera energetske efikasnosti zaključen između korisnika i dobavljača/izvođača.
- U slučaju realizacije mjere „Nabavka i ugradnja toplotne pumpe (zrak–voda)“, dobavljač/izvođač je dužan uz Zahtjev za isplatu dostaviti projektnu dokumentaciju izrađenu od ovlaštenog i certificiranog stručnog lica, kao i fiskalni račun (ili drugi važeći dokaz) o izvršenom plaćanju usluge izrade projektna dokumentacije, koji čine sastavni dio konačne dokumentacije za isplatu bespovratnih sredstava.

Napomena: *Dobavljač je dužan dostaviti Ministarstvu/PIT-u dva (2) istovjetna primjerka kompletne dokumentacije navedenoj u ovoj tački, na Protokol Zeničko-dobojskog kantona ili putem pošte na adresu navedenu u Javnom pozivu.*

Nakon zaprimanja Zahtjeva, Ministarstvo za prostorno uređenje promet i komunikacije i zaštitu okoline Zeničko dobojskog kantona putem Projektog imlementacionog tima-PIT (daljem tekstu: Ministarstvo), će izvršiti pregled istog, te u slučaju potrebne korekcije/dopune o istom informisati dobavljača. Po kompletiranju dostavljene dokumentacije, ovlašteni predstavnik Ministarstva ili angažovano stručno lice, izvršit će terenski obilazak u cilju utvrđivanja namjenskog utroška sredstava odnosno realizacije mjera o čemu se korisnik i/ili dobavljač prethodno obavještavaju. Neomogućavanje pristupa objektu ili onemogućavanje provjere može predstavljati osnov za obustavu postupka isplate ili povrat sredstava.

Po prihvatanju dokumentacije kojom se zahtijeva isplata dijela grant sredstava, Ministarstvo u roku od **30 dana** od zaprimanja iste šalje nalog za plaćanje PMU. Također PMU će dobavljaču/ izvođaču na bankovni račun u roku od **60 dana** isplatiti sredstva jednokratno.

PMU zadržava pravo pratiti namjensko korištenje sredstava, što uključuje i uslove koje je trebao ispunjavati odabrani dobavljač/izvođač, a koji su bili temelj za odobrenje sredstava i sklapanje Ugovora.

12. OPĆE ODREDBE

Ministarstvo za prostorno uređenje, promet i komunikacije i zaštitu okoline Zeničko-dobojskog kantona (u daljem tekstu: Ministarstvo), u okviru implementacije Projekta Air Quality Improvement Project (AQIP), ne snosi nikakve troškove nastale pripremom, sačinjavanjem i dostavljanjem prijave, te podnosilac prijave nema pravo na naknadu bilo kakvih troškova po osnovu učešća na Javnom pozivu. Ministarstvo potvrđuje isključivo dodjelu bespovratnih sredstava i vrši kontrolu namjenskog korištenja sredstava u okviru Projekta, te ne učestvuje u poslovno-ugovornim odnosima između korisnika i dobavljača/izvođača.

Ministarstvo ne snosi odgovornost za eventualnu štetu, kašnjenja u realizaciji, nedostatke u isporuci ili ugradnji opreme, raskid ugovora, kvalitet izvedenih radova, garancije, reklamacije, niti druge sporove koji mogu nastati između korisnika i dobavljača/izvođača, a koji se u cijelosti rješavaju između tih strana, bez prava na potraživanje bilo kakve naknade ili odgovornosti od Ministarstva.

Ministarstvo zadržava pravo kontrole realizacije mjera, uključujući administrativnu i terensku provjeru, kao i pravo zahtijevanja dodatne dokumentacije radi utvrđivanja ispunjenosti uslova iz Javnog poziva.

Ministarstvo se obavezuje da će lične podatke korisnika obrađivati i štiti u skladu sa važećim propisima koji uređuju oblast zaštite ličnih podataka. Svi lični podaci prikupljeni u okviru Javnog poziva koriste se isključivo u svrhu njegove provedbe i informisanja javnosti, u obimu neophodnom za ostvarenje svrhe iz prijave, u skladu sa Zakonom o zaštiti ličnih podataka („Službeni glasnik BiH“, br. 49/06, 76/11 i 89/11).

Broj:12-01-263/26-12-JP
Zenica,16.04.2026.godine

